



Kommunar i geografisk driftseining Hordaland

Dykkar referanse:

Vår referanse:

24/239816

Stad, dato:

Bergen, 22.05.2026

Høyringsbrev – endringar i organisasjonsstrukturen for dei geografiske driftseiningane i Vest politidistrikt

1. Bakgrunn

Verda, samfunnet og norsk politi står overfor store utfordringar i tida som kjem. Ei ny tryggleikspolitisk situasjon, eit stadig meir dynamisk og komplekst kriminalitetsbilette, klimaendringar og aukande førekomst av ekstremvêr, rask teknologisk utvikling og demografiske endringar er noko av det som påverkar korleis politiet må løyse samfunnsoppdraget sitt i samspel med innbyggjarar og samarbeidspartnarar.

Offentleg sektor og politiet er pålagde å utnytte ressursane meir effektivt og avgrense underliggjande kostnadsvekst, og ein ventar trongare økonomiske rammer i åra som kjem. Ressursrammene for politidistriktet blir opplevde som knappe slik dei er i dag. I tillegg har politidistriktet utfordringar med å halde på, utvikle og rekruttere nye medarbeidarar i store delar av politidistriktet innanfor den spreidde organiseringa vi har i dag.

Vest politidistrikt har difor gjennomført eit prosjekt for å vurdere og vidareutvikle:

- arbeids- og samarbeidsprosessar internt og eksternt
- organiseringa av dei geografiske driftseiningane
- eigeoms- og utstyrsporteføljen
- vakt- og beredskapsordningar
- samhandlinga mellom geografiske og funksjonelle driftseiningar
- fortløpande utviklingsmetodikk

Målet er å sikre best mogleg polititenester til befolkninga – både i dag og i åra som kjem innanfor dei rammene vi har til rådvelde.

Politidistriktet er stort og samansett med 38 kommunar, høg aktivitet, lange avstandar, krevjande vegnett og store variasjonar i befolkning, oppdragsmengd og kriminalitet. Ein vesentleg del av politioppdraga og den registrerte kriminaliteten er konsentrert rundt regionale trafikknutepunkt og større befolkningssentra. Samstundes er det avgjerande å

oppretthalde lokal tilgjenge, førebygging og beredskap også i områder med lågare oppdragsvolum og store avstandar.

2. Tema for høyring

Politimeisteren si leiargruppe har på dette grunnlaget tilrådd endringar som skal:

- sikre målretta og tilpassa nærvær der behovet for polititenester er størst
- utvikle større fagmiljø som kjem heile distriktet til gode
- leggje til rette for tydelegare prioriteringar, meir effektiv ressursbruk og avgrense underliggjande kostnadsvekst
- leggje til rette for større fagmiljø for å halde på, utvikle og rekruttere medarbeidarar i heile distriktet
- vidareutvikle samhandling internt i politiet og med kommunane
- sikre lokal nærleik, tilgjenge, førebygging og tryggleik

Politimeisteren si leiargruppe føreslår følgjande endringar:

- reduksjon i tal på politistasjonsdistrikt frå 14 til 9
- endring av sju politistasjonar til såkalla tilpassa politistasjonar
- fase ut fire politistasjonar der det over tid ikkje har vore eit reelt polititilbod
- oppretthalde tre geografiske driftseiningar inntil vidare

Ein sentral del av tilrådinga er å sjå nærleik for politiet på ein ny måte, ved å gå frå likt tilhald i faste bygg til å ha nærvær gjennom, mellom anna digitale møtepunkt, tilpassa politistasjonar og mobile møteplassar. Mobilt nærvær gir òg kortare responstid og betre moglegheit til å nå innbyggjarane raskare når dei treng politiet.

3. Høyring

Politidistriktet ber om høyringsinnspel frå alle kommunar i politidistriktet. Alle kommunar vil anten bli direkte eller indirekte rørte av endringane som er føreslått.

Vi ber særleg om kommunane sine vurderingar innan tre område:

1. **Generelle vurderingar** av den samla tilrådinga og endringane som er føreslått
2. **Spesifikke synspunkt** på endringar og avbøtande tiltak knytt til sårbarheiter som rører den einskilde kommunen
3. **Innspel til vidare samarbeid** mellom kommune og politi for å sikre gode, tilgjengelege og førebyggjande polititenester for alle innbyggjarar innanfor gjeldande rammer

Fristen for høyringssvar blir sett til **torsdag 1. oktober 2026**, jf. utgreiingsinstruksen § 3-3. Høyringssvar sendast til post.vest@politiet.no.

4. Kommunespesifikk utgreiing

Det blir organisatoriske endringar i Hordalandsregionen. Nordhordland politistasjonsdistrikt blir slått saman med Bergen nord politistasjonsdistrikt til Stor-Bergen nord politistasjonsdistrikt. Stor-Bergen nord politistasjonsdistrikt tek over polititenesta i Osterøy kommune, der politistasjonen blir fasa ut. Bjørnafjorden og Austevoll politistasjonsdistrikt blir slått saman med Bergen sør politistasjonsdistrikt til Stor-Bergen sør politistasjonsdistrikt. Begge dei nye politistasjonsdistrikta blir overført frå geografisk driftseining Hordaland til den geografiske driftseininga som vi førebels har kalla Stor-Bergen. Endringane vil i større eller mindre grad påverke kommunane i:

Voss

- Voss
- Vaksdal
- Ulvik
- Eidfjord
- Bjørnafjorden (områda Holmefjord, Eikelandssosen, Strandvik, Nordtveitgrend og Yddal)
- Kvam
- Samanger
- Tysnes
- Vik

Hardanger

- Ullensvang
- Kvinnherad

Her gjer vi greie for kva endringar i polititenestene som blir føreslått for dei enkelte kommunane, korleis sårbarheiter er vurderte, og kva avbøtande tiltak som blir føreslått sette i verk.

4.1. Endringar som rører ved dei ulike kommunane

Endringane som er tilrådd er:

- **Voss politistasjonsdistrikt blir slått saman med Kvam, Samnanger og Tysnes politistasjonsdistrikt til Voss politistasjonsdistrikt.** Politistasjonsdistriktet tek over Vik politistasjon frå Sogn politistasjonsdistrikt i geografisk driftseining Sogn og Fjordane. Dei fem politistasjonane Voss, Vik, Kvam, Tysnes (tilpassa politistasjon) og Fusa (tilpassa politistasjon) inngår i politistasjonsdistriktet. Vaksdal politistasjon blir fasa ut. Voss politistasjonsdistrikt inngår i den geografiske driftseininga Hordaland. Politistasjonsdistriktet får felles leiing og felles prioriteringar.
- **Hardanger politistasjonsdistrikt og Kvinnherad politistasjonsdistrikt blir slått saman til Hardanger politistasjonsdistrikt.** Dei to politistasjonane Hardanger og Kvinnherad inngår i politistasjonsdistriktet. Hardanger politistasjonsdistrikt inngår i den geografiske driftseininga Hordaland. Politistasjonsdistriktet får felles leiing og felles prioriteringar.

Dei funksjonelle driftseiningane i Vest politidistrikt vil framleis sørgje for spesialistkompetanse og rask sakshandsaming i alvorlege og kompetansekreivjande saker i heile distriktet.

4.2. Risiko- og sårbarheitsvurdering

Politidistriktet har vurdert sårbarheiter og risiko knytte til tema som er identifisert i eigen risiko- og sårbarheitsanalyse, høyringsinnspel og innbyggjardialog:

- responstid og beredskap
- lokal tilgjenge og publikumskontakt
- førebyggjande arbeid, særleg overfor barn og unge
- samhandling med kommunen og andre beredskapsaktørar

Risikoreduserande tiltak er skildra i punkt 4.3. Med risikoreduserande tiltak er restrisikoen vurdert som akseptabel for alle politistasjonsdistrikta.

Vurderinga for Voss politistasjonsdistrikt er at:

- **Responstid og beredskap.** Voss politistasjonsdistrikt tek over Vik politistasjonsdistrikt og inngår i eit formelt regionsamarbeid om vakt og beredskap med Sogn politistasjonsdistrikt om Indre Sogn. Voss politistasjonsdistrikt blir eit langstrekt distrikt frå Vik kommune i Sogn og Halne fjellstover på Hardangervidda til Tysnes og Bergen. Delar av politistasjonsdistriktet har store sesongvariasjonar knytte til turisme. Dette er ei sårbarheit som må møtast med risikoreduserande tiltak. Vik kan i periodar vere isolert grunna vêrforholda over Vikafjellet, og vere avhengig av ferje frå Sogn ved vegstenging. Fusa og Tysnes politistasjonar er tilpassa politistasjonar som i utgangspunktet ikkje har oppmøte for patruljane. Operasjonssentralen vil flåtestyre patruljane og tildele oppdrag til best kvalifiserte patrulje med omsyn til responstid og responsevne.
- **Lokal tilgjenge og publikumskontakt.** Voss politistasjonsdistrikt vil med sin store geografi og spreidd busetnad ha ei sårbarheit knytt til lokal tilgjenge og publikumskontakt. Sårbarheita må møtast med risikoreduserande tiltak.
- **Førebyggjande arbeid, særleg overfor barn og unge.** Det store og varierte politistasjonsdistriktet vil ha ei sårbarheit knytt til førebyggjande arbeid, særleg overfor barn og unge. Sårbarheita må møtast med risikoreduserande tiltak.
- **Samhandling med kommunen og andre beredskapsaktørar.** Risikoen for svekka samhandling med kommunane og andre beredskapsaktørar kan bli ei sårbarheit.

Vurderinga for Hardanger politistasjonsdistrikt er at:

- **Responstid og beredskap.** Politipatruljen vil mønstre på både i Odda og Kvinnherad som i dag, men det blir etablert eit nærare vaktsamarbeid i det nye politistasjonsdistriktet. Det er allereie etablert eit vaktsamarbeid mellom Vest og

Sør-Vest politidistrikt i området. Det oppstår ingen nye sårbarheiter når det gjeld responstid og beredskap etter samanslåinga av dei to politistasjonsdistrikta.

- **Lokal tilgjenge og publikumskontakt.** Det oppstår ingen nye sårbarheiter når det gjeld lokal tilgjenge og publikumskontakt etter samanslåinga av dei to politistasjonsdistrikta.
- **Førebyggjande arbeid, særleg overfor barn og unge.** Det oppstår ingen nye sårbarheiter når det gjeld førebyggjande arbeid, særleg overfor barn og unge etter samanslåinga av dei to politistasjonsdistrikta.
- **Samhandling med kommunen og andre beredskapsaktørar.** Det oppstår ingen nye sårbarheiter når det gjeld samhandlinga med kommunane og andre beredskapsaktørar etter samanslåinga av dei to politistasjonsdistrikta.

4.3. Risikoreduserande tiltak

Dei risikoreduserande tiltaka settast i verk for å redusere risikoen for at ressursane i for stor grad blir retta mot dei sentrale, men òg dei mindre sentrale strøka. Sårbarheitene skal balanserast gjennom følgjande tiltak:

4.3.1. Oppretthalding av tilpassa politistasjon

Det vil bli vidareført eit anna type tenestetilbod, kalla tilpassa politistasjon, i Fusa og Tysnes. Tenestetilbodet skal:

- sikre lokal tilgjenge, synlegheit og tillit
- støtte førebygging, politikontakt og samhandling med kommune og samarbeidspartnarar
- vere kontaktpunkt for innbyggjarane og arbeidsstad for førebyggjarar
- kunne brukast ved varsla hendingar og planlagd innsats

Ved behov kan stasjonen også fungere som basepunkt for patrulje, med arbeidsplassar for rapportskriving, pausar og enkelt utstyr.

Ein tilpassa politistasjon skal som minimum ha følgjande innhald:

- behovstilpassa opningstider
- moglegheit for å ta imot meldingar, tips og bekymringar frå innbyggjarane
- rettleiing om politiet sine tenester og vidare oppfølging

Avklaringar om tenesteinnhald og opningstid må gjerast i samarbeid med kommunane. Lokala blir tydeleg skilta.

Forvaltningstenester og sivil rettspleie inngår ikkje som minstekrav.

Tilpassa politistasjonar har ikkje fast oppmøte for patrulje, og lagrar ikkje verdiar som krev omfattande sikring, som til dømes beslagrom og våpenlagring. Det blir ikkje stilt faste krav til bemanning. Løysingane er baserte på lokale risikovurderingar og følgjer

Politiets fellestenester sitt konsept for mindre politistasjonar med lågare kostnader til tryggleik.

Ein tilpassa politistasjon gir lokalt nærvær og operativ støtte, men er ikkje ein fullinnretta politistasjon med kontinuerleg bemanning eller breitt tenestespekter.

Tenesteinnhaldet skal fastsetjast i instruks på politidistriktsnivå og følgjast opp for å sikre at den tilpassa politistasjonen fungerer som ein reell lokal politiressurs innanfor dei økonomiske rammene og dei samla prioriteringane.

4.3.2. Førebyggjande arbeid, særleg overfor barn og unge

Dei tilpassa politistasjonane vil, i tillegg til å vere eit basepunkt for politipatruljen og eit lågterskeltilbod for innbyggjarane, òg ha eit førebyggjande hovudføremål

4.3.3. Etablering av mobile oppmøteplassar

Planlagd og føreseieleg nærvær knytt til fastsette dagar, tider eller behov blir vesentleg i kommunane som dekkjer distrikta sine ytre område, og for Vaksdal der politistasjonen blir fasa ut. Mobile møteplassar består av politipatruljen og/eller politikontakt og skal sikre innbyggjardialog, informere og trygge befolkninga om relevante tema. Mobile møteplassar skal ivareta tilgjenge utan faste bygg. Ein mobil møteplass kan være på plassar kor folk ferdast eller samlast. Det kan òg leggjast til område kor det er naudsynt at politiet er til stades for å førebyggja kriminalitet.

Heile den geografiske driftseininga er éin og same vakt- og beredskapsregion, og det inneber at patruljar frå heile driftseininga, og nabo-driftseiningar, på ein saumlaus måte dekkjer akutte oppdrag etter flåtestyring frå operasjonssentralen. Den førebyggjande og synlege patruljetenesta vil vere målretta mot definerte utsette område, kombinert med målretta mobile møteplassar i dei ytre områda.

4.3.4. Oppretthalde samarbeid om førebyggjande arbeid og lokal beredskap

Samarbeidet om det førebyggjande arbeidet og den lokale beredskapen blir ivareteke gjennom dei tilpassa politistasjonane, patruljemannskap, målretta lokale møteplassar og innsatsleiarane i driftseininga.

Tiltaka skal samla bidra til at innbyggjarane i den geografiske driftseininga Hordaland framleis får tilgjengelege og relevante polititenester.

4.4. Vidare samarbeid mellom kommune og politi

Politidistriktet ser eit stort potensial i det vidare samarbeidet, mellom anna innan:

- meir målretta og konkret førebygging og tidleg innsats
- samlokalisering eller bruk av kommunale lokale
- felles planverk, øvingar og beredskapsarbeid
- bruk av mobile løysingar og alternative møteplassar

Vi ber kommunen særleg vurdere og gi innspel til korleis slikt samarbeid kan vidareutviklast, korleis lokale rus- og kriminalitetsførebyggjande tiltak (SLT), politikontakt og politiråd kan samordnast og vidareutviklast, gjerne i regionråd eller i interkommunalt samarbeid for mindre kommunar, og kva tilleggstenester som bør leggjast til dei tilpassa politistasjonane og dei mobile møteplassane.

Det er viktig å presisere at dette er starten på ein prosess; ikkje slutten. Kommunane sine høyringssvar vil bli samanstilte og vurderte, slik at dei kan inngå i den vidare handsaminga av innstillinga. Etter det vil innstillinga leggjast fram for partane etter Hovudavtalen, og etter det for direktoratet og departementet. Det betyr at Politimeisteren si leiargruppe no har sett ei strategisk retning som det vil ta noko tid å handsame og om mogeleg gjennomføre.

Dersom kommunane ønskjer meir informasjon om høyringa, ber vi om at de tek kontakt. Kontaktperson i Vest politidistrikt er prosjektleiar politiinspektør Morten Espen Ørn (morten.orn@politiet.no).

Med helsing

Ane Kvaal
politimeister

Torgeir Haugen
politiinspektør

Vedlegg:

Strategisk retning – innstilling på politistasjonsdistrikt og tenestestader i dei geografiske driftseiningane (GDE) i Vest politidistrikt

Sakshandsamar:

Morten Ørn
politiinspektør

Kommunar:

Bjørnafjorden
Eidfjord
Kvam
Kvinnherad
Samnanger
Tysnes

Ullensvang
Ulvik
Vaksdal
Vik
Voss